

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

"E ao to tei aroha ia vetahi ê ra; e aroha-atoa-hia mai ratou." Mat. 5: 7.

Nu. 1.

10 Atopa, 1910.

Mat. 4.

*Na te Feia Mo'a e te Mau Hoa Atoa no
"Te Heheuraa Apî."*

IA ORA NA OUTOU.

E HOA ino ma e, o tei parahi i te mau fenua moana aihuaraau no Farani i Oteania nei. Te faaite atu nei ra TE HEHEURAA APÎ ia outou na e, aita roa oia i fiu, aore hoi i rohirohi i te haaponoraa'tu i te mau parau maitai o tei faatupu noa i te oaoa, te hau, te mārū, te maitai, e te faaroo i roto i te aau taata nei. Te hinaaro nei TE HEHEURAA APÎ ia maitai paatoa ra te feia o tei noho i te mau fenua rii moana nei, ia rave ratou i te mau mea tia, te mau mea haavare ore ra, te mau mea viivii ore ra, ia haapao noa ra ratou i te mau mea e mauruuru ai Oia ra, ia riro ratou ei feia hapa ore, e te porao ore. Aita roa TE HEHEURAA APÎ i hinaaro e ia pohe atu i te hoê taata i te paeau tino e te varua atoa hoi, ia roaa paatoa râ i te ora mure ore. Te faaite atu nei râ matou e, te rave noa nei â matou i te ohipa neneiraa i TE HEHEURAA APÎ. E o te maha teie o te matahiti i te raveraa o teie nei ohipa popou i ô nei i rotupu ia outou na. E e afai faahou atu â TE HEHEURAA APÎ i te mau parau maitatai i teie nei matahiti mai ta'na i afai ê atu ia outou na i na matahiti e toru i mairi'a'e nei. E e riro teie nei vea ei poro haere i te parau faaaraara no te evanelia. E ei faaite atoa'tu oia i te mau parau rii apî i tupu i ô na i te mau fenua rarahi o te ao nei, mai te aueueraa fenua, te mau huru ati, te tama'i, te ma'i pohe, e te mau ohipa apî i iteahia, e te mau ravea apî i imihia e te feia feruri mana'o hohonu i taua mau mea ra. Te faaite atu nei râ TE HEHEURAA APÎ i to'na mauruuru rahi i te mau taeae e te mau tuahine e tae noa'tu i te mau hoa here atoa o tei tauturu mai ia'na ra. Ia ora na oe o tei taio i teie nei parau, ia haamaitaihia oe e te Atua.

Te Bapetizoraa.

(TUATIRAA.)

[A bapetizo anei Iesu e te mau aposetolo i te tamarii rii?
 Teie te parau, aore roa o Iesu aore atoa te mau aposetolo i bapetizo i te tamarii rii, no te mea ua faaue te Mesia ia ratou, na ô atura, "E haere outou e faariro te mau fenua atoa ei pîpî, ma te *haapii* atu ia ratou i te *haapao* i te mau mea'toa ta'u i parau atu ia outou na, e o tei *faaroo* e ua bapetizohia e ora ia." Haapao ihora te mau aposetolo i taua faaueraa ra a te Fatu ra, e ua poro haere ratou i te evanelia i te feia o tei tia ia *haapii*, e ia *faaroo*, e ia *haapao* hoi. Aore roa te parau mo'a i papaihia e faaite mai ia tatou e, ua bapetizo te mau aposetolo i te hoê tamarii rii, no te mea aita roa'tu e tia i te tamarii rii ia *haapao*, e ia *faaroo*, e ia *tatarahapa*. No reira e mea faufaa ore ia te bapetizo ia ratou. Eaha ta te Fatu ra haapaoraa i rave i rotupu i te mau tamarii rii? Teie ta te parau i faaite mai, oia hoi ua rave mai te Fatu ia ratou, e ua tuu atura i ta'na rima i nia iho ma te haamaitai atu ia ratou; aore roa oia i bapetizo ia ratou, no te mea hoi mai ia ratou to te basileia o te Atua. Eiaha e vare, aita roa te mea viivii, e te feia rave hara e parahi i te basileia o te Atua. No reira faariro atura te Mesia i te hoê tamarii rii, no to'na huru viivii ore e te hara ore ei hoho'a na te feia paari atoa ra, ia riro ratou atoa nei ei feia au, mai to ratou huru viivii ore e tia'i, ia ô ratou i te basileia ra o te ao. Mat. 18: 2, 3; 19: 13-16. Eaha hoi te tumu i taa ê ai te taata nei i te Atua e i to'na ra basileia hanahana? Teie ia, maori râ ta ratou ihora mau hara e te mau parau ino hoi. Isa. 59: 2. Aore roa te tamarii rii i ite i te hara, e te parau ino, e no reira aita e tia i te hoê mea ia faataa ê ratou i te basileia o te Atua ra, te parahi mau râ ratou i reira. E ia ore ratou i bapetizohia, e pohe atu ai, e tomo tia'tu ia ratou i roto i te basileia o te Atua no te mea te vahi ia i haapaohia na ratou; tei reira to ratou

mau melahi mo'a ra i te tiaraa i te hi'oraa'tu i te mata o te Atua ra. E no reira e ara maite te mau taata atoa, eiaha ia vahavaha'tu i te hoê o teie nei mau taata rii hara ore nei, i te haapiiraa e, e tuuhia te aiû i pohe ia ore i baptizohia i te po ra, tei reira te auahi ura ra i te amaraa i te rui e te ao e a muri noa'tu. E homa e, a faaroo mai na i te parau a taua orometua Porosetani tuiroo ra o Kalavina, tei na ô maira e, "Ua faaue te Mesia i te mau aposetolo ia *haapii* atu i te mau taata atoa na mua i to ratou baptizoraa, e eiaha e faatiahia ia baptizohia ratou maori râ ua na mua ratou i te faaite mai i te *faaroo* e te *tatarahapa*." E tia anei ia faaite mai te tamarii aruaru i te reira? I nafea te peu baptizoraa aiû i faatupuhia'i? Te faaite mai nei anei te parau i roto i te Bibilia nei ua baptizohia te hoê aiû? Teie te parau, Aita roa'tu. E no reira ua imi-hohonu-hia te tumu o taua peu nei e te mau taata paari, e ua iteahia. Na ô maira te hoê taata paari i te faaite mai, "Aore roa teie nei peu baptizoraa tamarii aruaru i iteahia i na tenetere e piti i muri a'e i te Mesia. E mea itea-ore-roa-hia te peu baptizoraa aiû i na matahiti e 200 i muri a'e i te Mesia. Aita te reira peu i haamatahia i roto i na tenetere e piti (oia hoi 200 matahiti) i muri iho i te tau no te Mesia. Aita roa te reira peu i itea i mua'tu i te pae matamua no te toru o te tenetere i muri a'e i te Mesia." Curcellaeus (te hoê taata papai parau tuatapapa). E e peu faatupu-noa-hia e te taata ana'e mai te faaue-ore-hia mai e te Mesia. Ua papu roa te mau parau i nia nei e, e ere roa na te Mesia e te mau aposetolo, teie nei peu baptizoraa aiû i te itearaa mai. I nafea râ i tupu mai ai? Tera mai te tau no to'na faatupuraahia, oia hoi, tei te pae matamua no te tenetere toru i muri a'e i te Mesia i iteahia mai ai taua peu hape roa nei. Tei te matahiti 253 M. F. ua haapao ihora na episekopo e ono ahuru i Afarika i te hoê apooraa, tei faaterehia e Kaporiano (Cyprian), episekopo no Carthage, e ua faaue maira ratou ia baptizohia te aiû i te piti e te toru o te mahana i muri a'e i

HISTORIAN'S OFFICE LIBRARY

The Church of Jesus Christ of Latter-day Saints

13239

te fanauraa. E mai reira mai, inaha noa nei â, ua parare roa'tura taua oroa hairesi ra i te mau haapaoraa e rave rahi. Te hoê vahi teie i faahuru-ê-hia e ua ruri-ê-hia e ratou i te evanelia mau a te Mesia. E ua na reira ratou i te faaô mai i te oroa hape rahi hairesi e teie nei haapaoraa tia ore roa i roto i te evanelia a Iesu Mesia. Ua faaite atoa mai te peropheta e tupu te reira. Ua na ô maira oia e, "Ua hapa ratou i te ture ra, ua ruri-ê-hia e ratou tei haapaohia ra." Ua na ô atoa te Mesia, "E mea faufaa ore râ ta ratou e pure ia'u nei, a haapii ai i tei tuuhia mai e te taata ana'e ra." Teie nei râ, ua papu roa ua haapaohia te baptizoraa na te feia e tia ia faaroo, e ia tatarahapa, e ia haapao hoi i te mau faaueraa a te evanelia nei; eiaha roa na te mau aiû o tei ore roa e tia ia haapao i te reira. E au mau hoa e, o tei taio i teie nei parau, teihea ta outou mau tiaraa? Ua baptizohia anei outou ei faaoreraa i ta outou ihora mau hara? Ua faaroo, e ua tatarahapa anei outou hou outou i baptizohia? Ahiri aita ra, a tia i nia, a faaroo i te evanelia, e ia tatarahapa, e ia baptizohia ia ô outou i roto i te Ekalesia a Iesu Mesia ia noaa hoi i te ora.

—VILIAMU SETEMILA.

"E inaha, e parau atu vau ia outou, e ua faaorahia te tamarîi rii mai te faatumuraahia mai â o te ao nei, na roto i ta'u Fanau Tahî; no reira e ore ratou e hara, aita te mana e tuu atu ia Satani ia faahema i te tamarîi rii e tae noa'tu i to ratou riroraa ei feia mana'o i mua ia'u nei, ua horoahia atu hoi ia ratou i tei tiahia e au ra, e tei au i to'u ihora hinaaro, ia riro ei faufaa rahi te titauhia i te rima o to ratou ra mau metua. E teie â, e parau atu vau ia outou, e ere anei e faauehia e au te feia atoa e ite to ratou ra, ia tatarahapa? e te taata aore to'na e ite ra, tei ia'u nei ia te haapao atu ia'na mai tei papaihia ra. E tirara ta'u e faaite atu i teie nei. Amene." B. F. S. 28: 13, 14.

"E ao to tei mâ i te aau; e ite hoi ratou i te Atua." Mat. 5: 8.

Te Ava Taero e Ta'na Ohipa
e Faatupu.

E AHA te ava taero? Te hoê mea ia i parauhia te toto no te taata pere moni apî; te itoito no te eiâ haru tao'a i te tuiraa po; te rohiraa no te mau nana eiâ haru tao'a i te mau vahi atoa ra; o tei tauturu atu i te taata tutuî fare i te po; o tei faatupu i te haavare, e o tei tauturu i te taata o tei parau i te parau haavare ra; o tei paruru i te taata eiâ, e o tei arue atu i te faainaina i te Atua; o tei faaoreraa atu i tei parauhia ra; o tei tauturu atu i te ohipa haavareraa; o tei faariro i te aroha ei riri; e o tei tâhitoito noa i te mau mea tia, e te mau parau haavare ore ra, e o tei faatupu i te mana'o i roto i te metua tane e taparahi noa i ta'na ihora mau tamarî; e o tei faaerehia te mau tamarî i te tufaa maa, te ahu, e te mau mea e rave rahi e au ia ratou. E e ama noa'i te mau tane, e e haaparuparu noa'i te mau vahine ia'na. Eiaha te reira mau mea iino ana'e; teie râ, te haapoto noa ra oia i te oraraa taata nei. E te faatupu noa ra oia i te tuhi, e te faainoraa'tu i te Atua, e tei tâhitohito i to te ra'i ra, e o tei afai mai na i te haamâ, eiaha te tura; e o tei faatupu noa i te mana'o ri'ari'a, eiaha i te mana'o popou; e o tei faaore i te hau i roto i te utuafare, e o tei faatupu i te tama'i, te upaupa, te ori, te taputo, e te maniania rahi i nia i te mau purumu; e o tei faariro atu nei i te taata maitai ra ei taata ino, te taata tao'a rahi ra ei taata veve, ia riro noa'tu oia ei oere taparu ori haere ani noa i te maa. Teie atoa te tahi mau ohipa ta te ava taero e faatupu, oia hoi e taparahi taata, e orure hau, e faatupu i te motoraa, e te ohipa iino i roto i te ao atoa nei. E e ata noa'i oia i te mau maamaa o tei pau ia'na ra. E ere anei te reira mau mea lino ta'na e rave ra? Teie te parau, E. E te haapohe atoa nei oia i te tino e te varua atoa o te taata o tei vare noa ia'na ra. Te ofai tibi te ava taero no te mau ohipa ino e rave rahi. O te metua tane e te metua vahine mau râ oia no te mau hara huru rau. Te hoa here-rahi-hia oia no te diabolô, e te enemi rahi roa ia no te Atua.

— MAITIHIÀ.

Te Parau Tuatapapa no Iosepha Semita.

1 / **T**E parau atu nei matou e, e peropheta mau Iosepha Semita na te Atua. E te faaroo atoa nei matou e, ua maiti-mau-hia oia e te Atua ei rave ohipa na'na i te tau hopea nei. Area râ aore oia i fariihia, e ua faainohia, e ua hamani-ino-roa-hia, e ua parauhia ei peropheta haavare oia e te mau taata e rave rahi, e tae noa'tu hoi i to'na taparahi-raahia e te enemi i te mahana 27 no Tiunu, 1844. E au mau hoa e, te peropheta o tei tohu mai i te parau, e ua tupu te parau a taua peropheta ra, e tapao papu roa ia na Iehova oia i tonono mai. Ia parau râ te tahi peropheta, e aore e tupu ta'na parau, ua papu roa ia e ere te parau i parauhia mai e Iehova ra, na taua peropheta ra ia i parau teoteo noa ra te reira; eiaha e tiaturi te reira huru peropheta, mai te papaihia. Deut. 18: 22.

2 Te papai nei au i teie nei parau tuatapapa no te peropheta Iosepha Semita ia ite outou i te parau mau no'na, e ia ite atoa outou i to'na huru mau, e ia ite outou e tavini mau oia na te Atua. Ua tohu oia i te parau, e ua tupu taua parau ra ei parau mau. Aita oia i faaino atu e ia haapeapea ia vetahi ê, e ua haapao maite oia i te ohipa a te Atua i tuuhia mai i roto i ta'na rima ia rave, e ua manuia taua ohipa ra, e ua tupu i te rahiraa. E teie nei, "pohe noa'i â oia te parau mai nei â." "E ao to te feia i pohe, tei pohe i roto i te Fatu ra." E ua na reira hoi te peropheta ra o Iosepha Semita. Ua patoia Iesu e te mau pipi o tei peehia ratou e te taata atoa. E ua patoi-atoa-hia te peropheta ra o Iosepha Semita ia ore te taata ia farii i ta'na parau, e ia rave i te ohipa a te Atua ta'na i rave ra. E e peropheta mana rahi oia. Teie râ, nohea mai to'na mana? No te ra'i mai anei? E na te taata anei? 3 Te parau atu nei matou e, no te ra'i mai. E i roto i teie nei parau e i te mau parau i tuatia-hia mai i tera avae e i tera avae, e tuatapapa-poto-hia te

ohipa ta'na i rave, e te parau ta'na i haapii; e na outou e feruri maite i te reira: tei maitai, a farii; tei ore e maitai, eiaha e farii. Eiaha outou e faahapa noa mai te ite ore. A hi'opoa maite outou i te mau mea atoa ra ta'na i rave ra, e tei maitai, a tapea maite outou i te reira. Tera mai te parau tuatapapa no Iosepha Semita:

4 Ua fanau Iosepha Semita i te 23 no Ditema i te m. 1805, i te oîre ra o Sarona (Sharon), i te mataeinaa ra o Winetora (Windsor), i te tufaa fenua rahi i parauhia ra o Veramona (Vermont), i te pae i te hitia o terâ ra i te fenua ra o Amerika. Tootoru tamarîi ta to'na ra na metua, e toopiti tamaroa e hoê tamahine, e o Iosepha te tamarîi toomaha. Topa'tu te i'oa ia'na ia Iosepha Semita, te i'oa ia o to'na ra metua tane. E i'oa maitai, e e ore hoi e parauhia taua i'oa ra i te tahi ohipa ino ia'na i to'na oraraa. Area râ e i'oa ia parauhia no te maitai e no te ino hoi na roto i te ao atoa nei.

5 I fanau Iosepha i na metua maitai. O Lute (Lucy) te i'oa o to'na ra metua vahine. E feia faatura-ana'e-hia to'na mau hui tupuna mai to ratou taeraa mai i te fenua ra o Amerika e inaha noa nei â. E faufaa rahi ta to'na ra na metua i faaipoipohia'i raua i te m. 1796, e i na matahiti hoi i muri a'e i te reira; area râ ua haapau-roa-hia ta raua faufaa i te haapeeraa'tu i te tarahu haavare i papaihia i to raua na i'oa e te tahi hoa tiaturi no raua. E taata faaapu to'na ra metua tane. Ua rave ihora oia i te ohipa faaapura^o fenua i te tau mahanahana, e i te tau vero ra, haapao iho^{ia} te oia i to'na toroa orometua haapii tamarîi. Aita rea ta'na e faufaa i noaa na roto i te mau ohipa i ravehia e ana. Uno tamata ihora oia i te ohipa i tera vahi e i tera vahi, aita e, o i manuïahia. E i te m. 1815, faarue atura ratou i te feⁱ i te ra o Veramona, haere atura i te fenua ra o Niu Ioka^{1909,} 100,000 York), parahi ai. tu e to

6 Ua faatia paha te Fatu ia roohia maira o Ios^{oia} hoi ta'na ra vahine o Lute i te mau ati huru rau. Ua na

hia oia i te haapii ia raua e ta raua mau tamarii ia tiaturi papu ia'na ra. Ua rave ana'e ihora ratou i te ohipa rahi rohirohi ma te mana'o e, e noaa mai i te maitai no te reira. Na roto i te ohipa rahi rohirohi, i faaetaetahia'i to ratou ra mau tino. E na roto i te tiaturi e maitai ai to ratou ra mau aau. Aita hoi o ratou ei maa taime i haamaûa-noa-hia. Ua haapiihia ratou e, e faaitoito, e ia haapao maitai hoi.

7 E taata tino rahi, e te itoito hoi to ratou ra metua tane. E e mau tino puai, e te itoito hoi to Iosepha e ta'na ra mau taeae, mai to ratou ra metua tane i te huru. Ua tauturu ratou ia'na i te mau ohipa faaapuraa, e ua tauturu atoa i te imiraa i te mau mea e au no te utuafare. Ua haapii oia ia ratou eiaha e haavare, e rave râ i te mau mea tia ra, e ia haapao maitai, e ia hinaaro hoi i te Atua ra. Ua haapii atoa oia ia ratou i te taio e i te papai parau. Aore hoi te mau ravea haapiiraa i iteahia i reira mai tei teie nei anotau i te huru.

8 Ua arataihia te utuafare o Iosepha ma e te Atua e tae atu ai ratou i te tufaa fenua rahi o Niu Ioka. Ei reira te vahi e haamatahia'i e te Atua i ta'na ohipa no te tau hopea nei e tia'i. E tae a'era Iosepha i te iva o to'na matahiti, te parahi ra ratou i te oire iti ra o Pamera (Palmyra) i te mataeinaa ra o Wena (Wayne). Parahi atura ratou i reira e e maha a'era matahiti, e ua rave ihora i te ohipa faaapuraa e fenua. E muri a'era, faarue atura ratou i taua vahi ra, maere tia'tura i te tahi oire i fatata mai, o tei parauhia ra e Fa Manesera (Manchester), i te mataeinaa ra o Onetario (Ontario). Ei reira ua noaa faahou te tahi fenua ei faaapute na no ratou. Ua fanau faahou te metua vahine, e teie nei pha te utuafare ra na tamarii toovau, e teie to ratou ra mau te oh, oia hoi o Alavina, o Haeramu, o Sophoronia, o Iose-rahi o o Samuela, o Viliamu, o Catereina, e o Dona Caralosa. anei? E tae a'era i te piti o te matahiti i to ratou parahiraa i ra'i masea, ua haamata ihora te tahi tufaa ekalesia Porosehia mai parauhia ra o Metodi (Methodist) i te faaitoito hua i

te a'oraa evanelia. E muri iti a'era ua peehia ratou e na tufaa ekalesia Porosetani i parauhia ra o Peresebeteriana (Presbyterian) raua o te Bapetizo (Baptist), e ua haapao pinepine ratou i te mau pureraa. Ei reira ua a'ohia te evanelia e ratou, e ua himene, e ua pure hoi, e ua rohi, e ua faaitoito hua i te feia atoa ra. E na roto i te faaitoito-hua-raa, ua pii uana'tura ma te reo teitei, e ua uuru noa, e ua ori hoi, e paruparu noa'i ratou. Aita te reira mau huru haapaoraa i faatupuhia e te Varua a te Atua. Tei te oire ra o Manesera te vahi no te faaitoito-hua-raa no te mau haapaoraa. E e rave rahi hoi te taata'o tei faarirohia ei feia ekalesia, e ua amui atu ratou i te haapaoraa ta ratou i hinaaro ra. E ia haamata ratou i te amahamaha, ua tupu te peapea i te rahiraa, e ei faaiteraa papu hoi to ratou inoino te tahi i te tahi, e ere ia te mea tia ia mana'o e e pipi mau ratou na Iesu Mesia.

—VILIAMU SETEMILA.

(E tuatihia mai teie parau.)

Te Mooraa Tao'a i Amerika.

AORE roa te mau mea'toa i hamanihia e i faatupuhia i te fenua ra o Amerika. Ua afaihia mai te mau mea e rave rahi mai te mau fenua êê ra, oia hoi te avaava, te tihota, te taofo, te ti, etc. Aita e tia ia faatupuhia'i teie nei mau mea i Amerika, no te toetoe o taua fenua ra. Ua afai-atoa-hia mai te taura, te mau mereti, te ahu, etc., i Amerika mai te mau fenua roa mai. Area râ, te haponu atu nei to Amerika i te mau mea e rave rahi i to te ao atoa nei, oia hoi te faraoa ota. te puaa, te mau machine huru rau, te vavai. te mau tiaa, e te iri raan, etc. Ua hau roa'tu teie nei mau mea i hamanihia i te hinaarohia e to Amerika. no reira e tia roa ia ia afaihia'tu ia ratou i te mau fenua êê, o tei ore e hamani i taua mau mea ra. Teie te moni e au i te mau mea i afaihia mai i Amerika mai te avae Tiurai, 1909, e tae noa'tu i te avae Tiunu, 1910, oia hoi 1,500,000,000 dara. Teie hoi te moni e au i te mau mea i afaihia'tu e to Amerika i te mau fenua êê ra i taua taime ra, oia hoi 1,750,000,000 dara.

Te Mau Parau Api.

PARAU FAAITE.

TE taata ra tei hinaaro i ta ratau mau vea e TE HEHEURAA APÎ no te matahiti toru, oia hoi te avae Atopa, 1909 e tae roa'e nei i teie avae Tetepa, 12 vea, ia haamauhia i te iri paari ei buka maitai roa, e haponono mai ratou i te mau vea i te piha neneiraa vea. E e oti maitai taua ohipa ra ia matou. Teie te hoo, hoê raera moni Farani.

E HOA e, a faaite atu i TE HEHEURAA APÎ i to taata tupu ia noaa atoa oia i te maitai.

I te mahana 23 no Tetepa, ua tae mai na nia ia Mariposa te tonitara apî Amerika, o North Winship to'na i'oa. Ua tae atoa mai to'na metua vahine.

I te 18 no Atete, i te fenua ra o Purutia, i Europa, ua pohe roa te peresideni no te hau Chili, o Pedro Montt to'na i'oa. E ma'i mafatu to'na, te tumu i pohe ai oia.

I te mahana 28 no Atete i mairi a'e nei, ua papai mai te parau apî no Magareva mai, oia hoi ua fanau mai te hoê puaa e piti fanau'a. Te hoê, e puaa mau ia; e te hoê ra, e hoho'a taata mau ia. E ua taparahibia taua puaa ra o tei au i te hoho'a taata nei.

Teie te parau apî no Takaroa. Ua noaa te hoê poe pârau maitai roa i te taata ra ia Paea a Metuaaro, teie te moni ta'na i titau ia hoo atu taua poe ra, oia hoi 3,500 dara moni Farani. Ua noaa atoa i te hoê poe maitai no to tatou taeae no Marere a Patea e ua tuu oia i te hoo 2,200 dara moni Farani; i parauhia e poe rahi e te tupu maitai.

I te mahana 14 no Atete, ua pau i te auhi te mau fare rarahi e te nehenehe hoi, i te oire ra o Brussels i Belgium, te tahi tufaa fenua i Europa. Te tere noa ra te tahi hi'oraa rê (exposition) no te ao atoa nei i reira, a ama noa'i i te auahi. Ua faaite mai te vea i te moni e au no te mau tao'a, e te mau fare, e te mau mea i pau ai i taua auahi ra, oia hoi 100,000,000 dara.

I te 20 no Atete, i te oire ra Pittsburg, i te pae hitia o te râ ra i te hau Amerika, ua mairi te hoê taata, o Elmer Grove to'na i'oa, no nia mai i te tahi pereoo uira, fati roa'era to'na a'i, topa noa ihora to'na upoo i nia iho i to'na ra taponono. Area râ, ua mau to'na upoo i na pue rima na'na iho, faatia a'era i nia, haere tia'tura i te utuafare. Mai reira, ua afai ratou ia'na i roto i te fare ma'i. Tapuhia to'na a'i e te taote, e ua iririhia mai te hoê ivi. E ua na ô maira te taote e, e ora paha teie nei taata.

Ua hoohia na poe no Punua a Kaoko e Maoake a Fareata i faatehia i roto i TE HEHEURAA APÎ i te avae Tiurai i mairi a'e nei. Teie te moni ta Punua i roaa mai, 750 dara. E to Maoake e 500 dara moni Farani.

Tei te fenua ra o Rusia i Europa, i te avae Atete i mairi a'e nei, te hoê ma'i pohe i parauhia cholera. Ua roohia mai na taata 23,944 i taua ma'i pohe, i te hebedoma hoê ra. E teie te rahi o te taata i pohe roa i taua ma'i ra i taua hebedoma ra, oia hoi 10,723.

I te avae Atete i mairi a'e nei, i te pae i te hitia o te râ o te hau Amerika, ua mau te hoê taata o Benjamin Prince to'na i'oa, i roto i te tahi opupu mata'i, e tae roa'era oia i nia roa'i te reva nei, oia hoi 6,000 avae. Ei reira, roohia ihora i te ati, mairi roa mai oia mai nia roa i te reva, e ua ô oia i te fenua nei. Pêpê ino roa oia hoi ua rarerare roa ta'na tino, pohe roa ihora.

I te mahana 16 no Atete, ua faaite mai na roto i te parau niuniu te tonitara Amerika o tei parahi i te fenua ra o Iapone, i te hau Amerika i teie nei parau apî, oia hoi e pape pue rahi roa tei te oire ra o Tokio. E ua na ô mai oia e, "E 500,000 taata ua ere te fare, e te maa i ô nei i teie nei â. E 1,122 taata ua pohe roa, e 3,953 fare ua pau roa, e 51,655 fare ua ino i taua vai pape pue ra." E ua faaite atoa mai oia i te rahi o te moni e au no te mau faaapu raiti i haamani-ino-hia i taua pape pue ra, oia hoi 4,250,000 dara.

No te poai rahi i te tau mahanahana i te hau Amerika i na avae i mairi a'e nei, i te pae tooâ o te râ, ua marô rahi te mau raau rii e te mau aihere o te tupu noa i nia i te mau mou'a. E no te haapao ore o te taata i reira, ua ama i te auahi. E i muri iti a'era i te reira, farara noa maira te mata'i, parare noa'tura i te mau vahi uru raau, e ua tupu i te rahiraa. E e rave rahi te mau taata, te mau puaa, e te mau fare, e te tahi mau oire atoa ua pau i taua auahi ra. Teie te moni e au no te mau mea ua pau, 5,000,000 dara, i na mataeinaa e pae. E ati ri'ari'a roa te reira. Aita e ravea ia horo te taata i te vahi haapuraa.

I te mahana 16 no Atete ua pupuhi te taata ra o James G. Gallagher i te taata ra o William J. Gaynor, te taata faatere i te oire rahi ra o Niu Ioka, i Amerika. Tei nia oia i te tahi pahi auahi, e ua ineine roa no to'na revaraa i te fenua ra o Europa, a pupuhi mai ai oia. Ua tano na ofai e piti ia'na, tei te upoo te tahi, e tei te tua te tahi. E taata puai rahi taua taata taparahi taata ra, area râ ua haruhia oia e te mau hoa no Gaynor, taputô noa maira oia, ua haavî ratou ia'na. E ua tuu te mutoi ia'na i roto i te fare tapearaa. E te taata ra o Gaynor, ua afai atura ratou ia'na i roto i te fare ma'i. E ua hi'opoahia oia e te mau taote, e ua mana'o a'era ratou e, e ora oia.

Ua faatupuhia te tahi faatitiauraa amuraa meia no to te ao atoa nei, i te oire ra o Niu Ioka. E ua riro te rê ia Morris Leepeske. Ua pau ia'na e 64 meia.

Te ora nei te hoê vahine, o Baba Vasilka to'na i'oa, i te fenua ra o Purutia, o tei parauhia te taata tahito roa i te mau taata i roto i te ao nei. Ua tae oia i te 125 no to'na ra matahiti. Ua rave noa oia i te ohipa i roto i te mau aua faaapu fenua hoê hanere e tiahapa matahiti. Ua itoitoe oia i teie nei â; aore to'na mata i mohimohi, e e mea maitai hoi to'na faaroora i te mau parau.

Teie te ohipa apî ua tae mai i Papeete nei, oia hoi te mau mori uira (electricity). Na taua taata itoitoe rahi ra o C. A. F. Ducoran i faatupu i taua ravea apî maitai rahi roa ra. E e rave rahi te mau taata, e te mau Tinito atoa hoi ua hoo i taua mau mori apî ra. E mea anaana rahi roa to'na maramarama, e turama mau ia. Ua hoo atoa to te oire i te tahi mau mori, e ua faatihia i te tahi mau purumu i te vahi i haere-pinepine-hia e te taata. E ravea maitai rahi roa hoi te reira no ratou.

I te 5 no Atete, i te fenua ra Purutia, ua faaterehia te hoê pahi reva. Tei roto i taua pahi ra 30 feia ratere, e na raatira fatere tootoru. E mea faahiahia rahi to ratou maueraa na ropu i te reva, e tae a'era ratou i te vahi i nia roa'e, oia hoi 4,000 avae i te teitei i nia atu i te fenua nei. Ei reira roohia ihora ratou i te ati ino, oia hoi te hoê mata'i rahi, e ua fati te tahi machine faatere i taua mata'i ino ra. I muri a'e i te reira, aita e ravea ia faatere maitai te raatira ia'na. E muri a'e, mairi taue noa oia i raro, parari a'era. Aita hoi i ino noa'e te feia i roto, maori râ te pahi ana'e. E pahi rahi. Teie te hoo no taua pahi ra, oia hoi 137,000 dara.

Ua tupu ihora te peapea rahi i te fenua ra o Paniola. O te haapaoraa Katorika, o te haapaoraa ana'e ia o tei faatihia i taua fenua ra. Area râ, ua hinaaro te tahi mau taata ia haamori i te Atua mai te au i ta ratou iho i hinaaro. No reira, ua faatia ihora ratou i te mau haapaoraa na ratou iho. E ite a'era te Pope i Roma i teie nei ohipa i ravehia e ratou ra, faaue atura oia i te arii o Paniola, o Alfonso to'na i'oa, ia opani i taua mau haapaoraa êê ra. Area râ, aore te arii i haapao i te faaueraa a te Pope; ua faatia râ oia i te mau haapaoraa i ta ratou ra ohipa. Ei reira, riri ihora te Pope i te arii ra o Alfonso. tama'i a'era raua te tahi i te tahi, e ua tupu noa ihora te peapea i te rahiraa i nia iho i taua fenua'toa ra. Aita e oti taua peapea ra i teie nei â, e aita'toa i itehia te hopea ra.

Toae a Maire, Faaau Parau,

Rue Dumont d'Urville, Orovini, Papeete, Tahiti.

W. A. Seegmiller, Imprimeur,

Rue Bréa et de la rue Dumont d'Urville, Papeete, Tahiti.